

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U BANOVIĆIMA
Broj: 127 0 Pr 082278 25 Zm
Banovići, 15.04.2025. godine

Općinski sud u Banovićima, sudija Damir Dautović, uz učešće zapisničara Azre Mujić, rješavajući po zahtjevu Ministarstva unutrašnjih poslova TK, Policijska uprava Banovići, Policijska stanica Banovići, za izricanje zaštitnih mjera učinocu nasilja u porodici S.E., broj: 08-06/13-2-03.4-1291/25 od 14.04.2025. godine, na osnovu člana 8. stav 1., člana 9. stav 1. tačka a), c), č), é) i d), člana 10. tačka c), te članova 27., 28. i 29. Zakona o zaštiti od nasilja u porodici i nasilja prema ženama u Federaciji BiH, („Službene novine F BiH”, broj: 19/25), dana 15.04.2025. godine, donio je

RJEŠENJE

S.E., sin I., rođen ... godine, u T., sa prebivalištem u B., ..., državljanin BiH, po zanimanju NK radnik, nezaposlen, lična karta broj: ..., izdata od strane MUP TK Banovići, JMB: ...,

što je:

dana 14.04.2025. godine, u 15,50 sati, drskim i bezobzirnim ponašanjem, što je i htio, prema svom ocu, R.M.. i sestri, Z.J., na način da je verbalnim napadom, vrijeđanjem, kao i upućivanjem psovki i pogrđnih imena, a zatim ih istjerujući iz njihovog zajedničkog doma, kod istih uzrokovao strah i osjećaj lične ugroženosti, te je vršio povredu dostojanstva svog oca, R.M., na način da ga je tjerao da prosi, kako bi mu donio novac, da bi u jednom trenutku, S.E., ponovo, postupajući na način koji može prouzrokovati fizičku ili psihičku bol ili patnju, kod svog oca, R.M., primijenio fizičku silu na fizički integritet svog oca, na način da ga je rukama odgurnuo u pravcu izlaznih vrata, ponovo mu govoreći da ide da prosi i donese novac,

iz čega proizlaze osnovi sumnje da je učinio radnje nasilja u porodici iz člana 8. stav 1., 9. stav 1. tačka a), c), č), é) i d), prema članu porodice iz člana 10. tačka c), Zakona o zaštiti od nasilja u porodici i nasilja prema ženama u Federaciji BiH,

IZRIČE

- ZAŠTITNU MJERU UDALJENJE IZ STANA, KUĆE ILI DRUGOG STAMBENOG PROSTORA I ZABRANA VRAĆANJA U KUĆU ILI DRUGI STAMBENI PROSTOR u trajanju od 2 (dva) mjeseca.

S.E., dužan je odmah napustiti stan, kuću ili drugi stambeni prostor, uz prisustvo policijskog službenika, a ključeve objekta iz kojeg se udaljava predati žrtvi nasilja ili

drugom prisutnom licu koje će ih predati žrtvi nasilja, a sve u skladu sa članom 27. stav 1. i 2. i članom 28. Pravilnika o načinu provođenja zaštitnih mjera za počinioca nasilja u porodici koje su u nadležnosti policije („Službene novine F BiH“ broj: 19/14, 95/18 i 77/24).

- ZAŠTITNU MJERU ZABRANA PRIBLIŽAVANJA ŽRTVI NASILJA, ocu, R.M. i sestri, Z.J., na svim javnim mjestima, mjestu boravišta i mjestu stanovanja na udaljenosti koja predstavlja opasnost za osobu izloženu nasilju, a najviše do 100 metara, u trajanju od 2 (dva) mjeseca.
- ZAŠTITNU MJERU ZABRANA KOMUNIKACIJE, UZNEMIRAVANJA I UHOĐENJA ŽRTVE NASILJA, oca, R.M. i sestre, Z.J. u trajanju od 2 (dva) mjeseca, na svim javnim mjestima i na adresi stanovanja, odnosno u stambenoj jedinici u kojoj žrtve nasilja stanuju.

Ukoliko učinilac nasilja prekrši izrečenu zaštitnu mjeru udaljenje iz stana, kuće ili drugog stambenog prostora i zabranu vraćanja u stan, kuću ili drugi stambeni prostor, zaštitnu mjeru zabrana približavanja žrtvi nasilja i zaštitnu mjeru zabrana komunikacije, uznemiravanja i uhođenja žrtve nasilja, u skladu sa odredbama člana 81. stav 1. Zakona o zaštiti od nasilja u porodici i nasilja prema ženama u F BiH, kaznit će se za krivično djelo novčanom kaznom ili kaznom zatvora do tri godine.

Izrečene zaštitne mjere izvršit će Ministarstvo unutrašnjih poslova TK, Policijska uprava Banovići.

Izrečene zaštitne mjere počinju teći od dana donošenja rješenja.

Žalba na rješenje ne odlaže izvršenje rješenja.

Troškovi postupka padaju na teret budžetskih sredstava.

Obrazloženje

Ministarstvo unutrašnjih poslova TK, Policijska uprava Banovići, Policijska stanica Banovići, podnijela je Općinskom sudu u Banovićima, dana 14.04.2025. godine, Zahtjev za izricanje zaštitnih mjera, broj: 08-06/13-2-03.4-1291/25, od 14.04.2025. godine, kojim se traži da se S.E., sin I, izreknu zaštitne mjere: udaljenje iz stana kuće ili drugog stambenog prostora i zabrana vraćanja u stan, kuću ili drugi stambeni prostor, zabrana približavanja žrtvi nasilja i zabrana komunikacije, uznemiravanja i uhođenja žrtve nasilja, u skladu sa odredbama člana 26. stav 1. tačka a), b) i c), članova 27., 28. i 29. Zakona o zaštiti od nasilja u porodici i nasilja prema ženama u F BiH, jer postoje osnovi sumnje da je učinio radnje nasilje u porodici iz člana 8. stav 1. i člana 9. stav 1. tačke a), c), č), é) i d) navedenog Zakona, prema svom ocu R.M. i svojoj sestri Z.J.. U zahtjevu se navodi da je 14.04.2025. godine, u

15,50 sati, dežurna služba Policijska stanica Banovići zaprimila telefonsku prijavu Z.J., koja je prijavila svog brata, S.E., da iz njihove porodične kuće u naselju T., istjeruje nju i njihovog oca R.M.. Z.J. i R.M. izjavili su da ovo nije prvi put da S.E. tjera svog oca R.M. da ide prosjačiti, nakon čega bi od R.M. uzimao novac, koji sakupi prosjačenjem. S.E., je 14.04.2025. godine, oko 17,25 pozvao Policijsku stanicu Banovići, te je izjavio da je u toku dana imao porodičnih problema u porodičnoj kući u mjestu T., općina B. i da se u momentu poziva nalazi u blizini S..

Na osnovu člana 19. stav 1., a u vezi članom 39. stav 5. Zakona o zaštiti od nasilja u porodici i nasilja prema ženama u F BiH, te primjenom člana 66. Zakona o prekršajima F BiH, sud nije pozivao nasilnu osobu na usmeni pretres, jer je imao dovoljno dokaza koji su dostavljeni uz zahtjev za izricanje zaštitnih mjera, pri čemu je cijenio hitnost u rješavanju.

Naime, na osnovu Prijave o događaju Policijske uprave Banovići, Policijska stanica Banovići, broj: 773725, od 14.04.2025. godine, Službene zabilješke Policijske uprave Banovići, evidencijski broj: 773/25 od 14.04.2025. godine, Zapisnika Policijske uprave Banovići, broj: 08-06/13-1- /25 od 14.04.2025. godine o saslušanju svjedoka R.M. i Zapisnika Policijske uprave Banovići, broj: 08-06/13-1- /25 od 14.04.2025. godine o saslušanju svjedoka Z.J., sud je utvrdio da je S.E., postupao na način opisan u zahtjevu za izricanje zaštitnih mjera i da je učinio radnje nasilja u porodici propisane članom 8. stav 1. i članom 9. stav 1. tačke a), c), č), é) i d) Zakona o zaštiti od nasilja u porodici i nasilja prema ženama u F BiH, prema svom ocu i sestri, kao članovima porodice, u smislu člana 10. tačka c), navedenog Zakona.

Izričući zaštitne mjere, sud je cijenio i Zapisnik o konsultaciji sa organom starateljstva kod predlaganja zaštitnih mjera, Policijske uprave Banovići, broj: 08-06/13-2-03.4-1291/25 od 14.04.2025. godine, iz kojeg proizlazi da je Javna ustanova Centar za socijalni rad Banovići saglasna sa predloženim zaštitnim mjerama.

Imajući u vidu navedeno, sud nalazi da su izrečene zaštitne mjere neophodne radi otklanjanja opasnosti po fizički i psihički integritet žrtve nasilja i sprečavanje ponavljanja nasilja otklanjanjem stanja i uslova koji mogu uticati ili poticajno djelovati da učinilac ponovno izvrši radnje nasilja.

Ministarstvo unutrašnjih poslova TK, Policijska uprava Banovići, na čijem području su nastanjene žrtve nasilja, obavezno je osigurati izvršenje izrečenih zaštitnih mjera, te redovno pratiti izvršenje mjera, sačiniti i dostaviti ovom sudu izvještaj o njihovom izvršenju svakih 30 dana, a po potrebi i ranije, predložiti prekid ili zamjene mjere kada to smatra potrebnim, u skladu sa članom 42. Zakona o zaštiti od nasilja u porodici i nasilja prema ženama u F BiH.

Odluku o troškovima postupka sud je donio na osnovu člana 13. stav 4. Zakona o zaštiti od nasilja u porodici i nasilja prema ženama u F BiH.

Zapisničar

Sudija

Pouka o pravnom lijeku: Protiv rješenja dozvoljena je žalba Kantonalnom sudu u Tuzli, putem ovog suda, u roku od tri dana od dana prijema rješenja. Žalbu može izjaviti podnosilac zahtjeva za izricanje zaštitne mjere, žrtva nasilja i osoba kojoj je izrečena zaštitna mjera. Žalba se izjavljuje u tri primjerka. Žalba ne odlaže izvršenje rješenja.